



GUERZ

279

Var sujet eun Den Yaouanq a voa deut da baea pèvar scoët goude e varo.

Speret-Santel, m'o ped, anflamit va speret,
Da gana eur c'hantie evit ar Vretonet,
Var sujet eun exemple trist pehini zo êrnet
Ebars en Breiz-Izel, e mis Du tremenet.

Crena ra va c'halon ive va oll memprou,
Va daoulagat ne reont nemet scùlla daelou,
O tont da gonsideri peguer trist è ar matier :
Goulen a ràn sicour eus ar Verc'hes santel.

Eun den yaouanc, sivoas, voa n'em abandonnet,
Goude ma voe maro e dud gant ar c'hlenved,
A voa n'em abandonnet da bep seurt tristidiguez,
Da bep tristidiguez, da bep eurt paourentez.

Evel ma voa yaouanc, ne grede clasq netra ;
Tud vad, dre charite, a gass tamou dezà ;
Hac evel ma oa yaouanc e teujot d'er scandalat
Pa na gare sevel ha mont da labourat.

Souffr a ra mil injur gand gùir baciantet,
O laqat e fianç er Verc'hes beniguet,
Dre m'en devoa e imach hac hini ar Bassion,
Ha ma rè diraze bemdez e oréson.

Un den eus ar c'hontre, un den eus ar c'hartier
A deuas d'e velet, o clêvet e vizer,
En eur lara deàn : deus d'am zi da labourat,
Ar c'hès a respontas : ne meus qet a zillad.

Gouzout a ràn certen labourat an douar ;
Mes allas ! em'er paour, ne meus na pal na mar :
Pèvar scoët a vanefe din evit en em equa.
Me a yêlo d'ho ti sur evit ho paea.

An ozac'h var ar guer a ro pèvar scoët,
O lavarar deàn : Va mignon, ne vanq qet,
En eur lavaret deàn : deus d'am zi da labourat
Pa po bet pal ha mar ha prenet da zillad.

Monet a ra d'e di, ma voe eur pennad ;
Plijont a rè deze certen da labourat ;
Un devez dreist ar re all e voe meurbet estonet
O sonjal paour-qèz pelec'h e voa chomet.
Ma ejont ta da velet, hac e voe cavet maro
Ebars en e lochic, var eun dornad colo.

Lienet voe è gorf vit bea antêret ;
Ar brud a zavas prest, ma teujot d'e velet,
An den-màn' deuas ive evel m'oa eus ar c'hanton,
A deuas d'e velet... O Doue pez eston !

Pa zorti eus an ti, d'an oll e lavare :
Orato birviqen e ene ne antre
E Barados un Doue, qen en devezo paeet
A pez a rois deàn n'eus qet pell pèvar scoet.

Dre ar c'homzou terrupl pere a brononças,
N'oun penos an douar d'e lonqà ne zigoras,
Oc'h arrêti eun ene a voa e vont d'ar joayou,
Ar vije recevet gant Jesus en eëvou.

Ar Verc'hes biniguet, dre ma voe dêi fidel,
A accord eur mennad evit he zervicher,
Ma teuje var an douar eun instant da labourat,
Evit monet d'an ti da baea ar barbar.

Monet a ra d'e di, ha ma voa recevet
Goulen a ra labour, ma voe deàn roet ;
Labourat a ra er parq qement hac an tri güella,
Ar pez zo estonus, hep débri nac eva.

Pa zeu coulz ar repos, caer e vije 'r pedi
Evit monet gante assemblez dà zèbri,
En em denne a goste, hac eno var e c'hiniou
En em string d'an daoulin evit souffr e boaniou.

Dont a ra 'n uzuiller, qemer a ra eston,
Hac èn monet ractal da laret d'ar Person
En devoa eul labourer hac a rè qement a tri,
Ar pez zo estonus, hep eva na débri.

MÀ, eme ar Person, cuntinuit bepret ;
Bremâ zouden valant me yêlo d'e velet,
Mes pa éruas er parq, dre bermission Doue,
Ec'h anaveas pront penos voa eun ene.

Me coajur, eme 'r Person, lavar dia me a ped
Nè qet hirio eis de em boa da antêret ?
Petra a zefot dide ? Petra a glasques amà !
Petra a zefot did evit da zelvira ?

Pèvar scoët am boa bet digant mestr an ti-mà,
On deut dre vour veyen sur euit o faea :
Oh ! e leac'h pèvar scoet, eiz certen a vo roet,
Eur veach, ene paour, qen a vi delivret.

Ne meus qet ar pouvoar da entre ar joayou,
Nemet gant va Ael-mat a clêfen ar c'hêlou
Pedit Doue evidon, me a ya prest d'an évou :
Varc'hoas d'ar memes heur me rento ar c'hêlou.

Dont a ra ar Person da zigass an arc'hant,
Ma vije delivret a boan hac a dourmant,
Mes me, eme an ene, am boa int bet digantan :
P' oc'h eus ar vadelez, me o rento deàn.

Pa astennas e zorn da guemer an arc'hant,
E santas an ardor, ar boan hac an tourmant ;
E vrec'h deo betec e scoa en instant a voe dêvet,
An arc'hant eus e zorn d'an douar zo qüeet,
Adieu, Autrou Person, me ya bremâ d'ar joayou,
Me bedo evidoc'h Jesus-Christ, hon Autrou.

Pa dleo un den dêc'h, pa yêl eus ar bed-mâ,
Elec'h desirout drouc, pedit Doue gantà :
Pedomp bepret ha meulomp ma zayo da repos,
Ha da veuli Doue en gloar ar Barados.